



SAMOA

Faatulagaina o Aiaiga

- | | | | |
|----|-------------------------------|----|---------------------------------|
| 1. | Igoa puupuu ma le amataga | | |
| 2. | Faamatalaina o uiga o upu | 5. | Kamupani i le Fale Meli |
| 3. | Aano moni o le Tulafono | 6. | Aitalafu a le Kamupani |
| 4. | Faamatuu atu o meatotino a le | | Aia tatau a le Kamupani i Tauti |

1997, Nu.21

O SE TULAFONO e aiaia ai mo le faagaoioia o fesootaiga tau komepiuta i totonu o Samoa i le faamatuu atu lea i le Fale Meli o meatotino o lo o umia e le Pacific Internet Services, ma sa faaaogaina e le kamupani a o le i amata faamamaluina lenei Tulafono. (22 Tesema 1997)

UA FAIA e le Fono Aoao Faitulafono o Samoa i totonu o le Palemene ua potopoto e faapea:-

1. Igoa puupuu ma le amataga-(1) E mafai ona taua lenei Tulafono o le Tulafono o Fale Meli ma Fesootaiga Tau Komepiuta Faava-o-Malo 1997.

(2) O lenei Tulafono o le a amata faamamaluina i le aso o le a tuuina i ai le maliega a le Ao o le Malo.

2. Faamatalaina o uiga o upu - I totonu o lenei Tulafono, ae vagana ai ua manaomia e le mataupu se isi uiga e ese ai - "Kamupani" o lona uiga o le vaega o lo o faia fefaatauaiga i Samoa i lalo o le igoa Pacific Internet Services:

"Fesootaiga tau Komepiuta Faava-o-malo" o lona uiga o le avanoa i fesootaiga faasatelite na tuuina atu e le kamupani, i luga o se maliega na faia ma le Fale Meli i po o se taimi o Iulai 1996:

"Galuega o Fesootaiga tau Komepiuta Faava-o-malo" e aofia ai fesootaiga i le aotelega o faamatalaga a le lalolagi ma le malosi e mafai ona auina atu ma mauaina mai meli faa-komepiuta:

"Minisita " o lona uiga o le Minisita o Fale Meli ma Fesootaiga:

"Fale Meli" o lo o uiga tutusa e pei ona i totonu o le Tulafono o Fale Meli 1972:

"Meatotino a le Kamupani" e aofia ai meatotino uma e umia e le kamupani po o taofia e ia ma e faasino i le mauaina o galuega tau fesootaiga tau komepiuta faava-o-malo, po o e pei ona aofia ai i fesootaiga tau komepiuta faava-o-malo.

3. Aano moni o le Tulafono - O le aano moni o lenei Tulafono o le:

- (a) Ina ia faamautinoaina ai le faaauauina o le tuuina atu o galuega tau fesootaiga faa-komepiuta i totonu o Samoa.
- (b) Faamatuu atu i le Fale Meli, o meatotino a le kamupani sa faaaogaina i sootaga ma fesootaiga tau komepiuta faava-o-malo i totonu o Samoa, a o le i faalavelaveina le galuega na mafua mai i le le totogiina e le kamupani o tupe o lo o nofo aitalafu ai i totonu o Samoa ma isi nofoaga; ma
- (c) Faatagaina le kamupani e faatalosagaina ai tau mo le mauaina mai o ana meatotino, o ia aofaiga o tupe e faapaleni agai i tupe o lo o nofo aitalafu ai le kamupani i le Fale Meli.

4. Faamatuu atu o meatotino a le kamupani i le Fale Meli-(1) O meatotino uma e patino i le kamupani ua mauaina nei e le Malo ma o le umia patino o ia meatotino ua faapea ona faamatuu atu i le Fale Meli.

(2) O le a tatau i le kamupani ona agavaa e talosagaina tau e tusa ai i meatotino patino i le kamupani pe afai e tusa ai ma aiaiga o lenei Tulafono.

(3) O le Fale Meli ua i ai le pule e faia ai mea uma talafeagai ma tulaga e ono aliai mai i le tuuina atu o galuega tau fesootaiga faa-komepiuta faava-o-malo i totonu o Samoa.

5. Aitalafu a le Kamupani-(1) O le kamupani o lo o nofo aitalafu i le Fale Meli i le aofaiga ua fuafuaina e le Minisita e faapea o se aofaiga e le i totogiina ma o lo o nofo aitalafu ai le kamupani e tusa ai i le fesootaiga faa-komepiuta faava-o-malo.

(2) O le aofaiga ua fuafuaina e le Minisita i lalo o le faafuaiupu (1) e ono mafai ona toe iloiloina e le Faamasinoga Sili mo le aano moni o le fuaiupu 6.

6. Aia tatau a le Kamupani i Tau-(1) O le kamupani o le a tatau ona i ai le aia tatau i tau e tusa ai ma meatotino e patino i le kamupani ua faamatuu atu i le Fale Meli i luga o mafuaaga o lenei Tulafono, pe afai e tusa ai ma lenei fuaiupu.

(2) O le tau e totogi atu i le kamupani e tatau ona fua i le tau i le taimi nei o le meatotino ua faamatuu atu i le Fale Meli e lenei Tulafono ma e leai se isi talosaga mo se tau e ono mafai ona faia.

(3) E mafai e le kamupani ona faia se talosaga i le Faamasinoga Sili e tusa ai ma le Mataupu 14(1)(b) o le Faavae.

(4) I le sailiiliga o se aofaiga o se tau o lo o nofo aitalafu ai i le kamupani i lalo o lenei fuaiupu, o le Faamasinoga Sili e tatau ona toese mai le aofaiga e totogi atu i le kamupani mai aitalafu ua fuafuaina e tusa ai ma le fuaiupu 5 ma e mafai ona faia se poloaiga mo le kamupani po o le Fale Meli, po o ai lava e faatatau i ai aitalafu e le i totogiina.

(5) O le kamupani ma le Malo e tatau ona i ai le aia e toe talosaga ai i le Faamasinoga o Talosaga e tusa ai ma Tulafono.